

Carta na seicwanom Pablo na m'aⁿ nn'aⁿ tsjoom Éfeso

1 ¹ Ja Pablo, ee na l'ue ts'om Ty'oots'om, cwiluiindyō apóstol, ñ'oomwaa' ma'moⁿna' ts'aⁿ na majñom Cristo Jesús ts'iaaⁿ 'naaⁿaⁿ. Matseicwanoⁿya cartawaa na m'aⁿyo' tsjoom Éfeso na la'xmaⁿyo' cwentaa' Ty'oots'om ndo' na cwila'yu'yo' ñ'eⁿ Cristo Jesús. ² Nquii Tsotyaaya Ty'oots'om na cwila't'maaⁿndyō ñequio Jesucristo na cwiluiñê na matsa'ntjoom jaa, quiana na nnto'ñoom'yo' juu naya na laxmaⁿna ñequio juu na tjañomtíuu c'oom ts'aⁿ jo ndaana.

Matio'naaⁿñe Cristo jaa

³ Cwila't'maaⁿndyō nquii Ty'oots'om na cwiluiñê tsotye Jesucristo na matseixmaaⁿ na matsa'ntjoom jaa. Nc'e na matseitjoom'na' jaa ñequio Cristo, jo' xjeⁿ cañoom'lueecheⁿ nc'e Espíritu Santo matio'naaⁿñê jaa ñequio cwii cwii nnom na matseixmaaⁿ na m'aaⁿ cañoom'luee. ⁴ Cwitjoocheⁿ na tqueⁿ Ty'oots'om tsjoomnancue, jnda tjeii'ñê jaa na nntseitjoom'na' jaa ñequio Cristo. Luaa' s'aaⁿ cha nlqueⁿna' jaa na lju'ndyō jo nnoom, ndo' na tjaa jnaⁿ cwicolaxmaaⁿya jo nnoom. ⁵ Ee na wi' ts'oom jaa jo' chii xjeⁿ na jndyeecheⁿ tjeii'ñê jaa na nluiindyō ntseinaaⁿ nc'e Jesucristo, ee luaa' tqueeⁿ ee na ljo' l'ue ts'oom na nluii. ⁶ Tuui na ljo' cha' cantyja 'naaⁿ jo' nntseit'maaⁿñena' juu naya na matseixmaaⁿ, na cwe' yu tquiaaⁿ na la'xmaaⁿya nc'e nquii Jnaaⁿ na jeeⁿ candya' ts'oom. ⁷ Cantyja 'naaⁿ juu na jeeⁿ wi' ts'oom jaa, jo' na macwji'n'maaⁿñê jaa ee na tue' Jnaaⁿ, na matseit'maⁿ ts'oom jnaaⁿya. ⁸ Candaa'ya ma'moⁿ Ty'oots'om na wi' ts'oom jaa na matseijnōoⁿoⁿ n'ooⁿya ndo' mañequiaaⁿ na cwila'nōoⁿa. ⁹ Ndo' jnda t'mōoⁿ ndaaya juu na l'ue ts'oom na wanty'íuu' tyom'aaⁿna', majuu cantyjati na jnaⁿ cha'tso na seijndaa'ñê na nncjaacandaa'na'. ¹⁰ Juu ñ'oom wanty'íuu'ñeeⁿ ma'moⁿna' na quia nncue'ntyjō xjeⁿ nntseicandaa'ñeñ'eⁿna', matseijndaa'ñê na cha'tso na m'aⁿ cañoom'luee ñequio nnom tsjoomnancue nc'om joo jo' nacje 'naaⁿ Cristo.

¹¹ Nc'e na jnda seitjoom'na' jaa ñ'eⁿ Cristo, teiyo tjeii'ñe Ty'oots'om jaa cha na nc'oomna' jaa na nndaaya cha'na na nndaa' jom, ndo' na nncuaa na ljo' matseiljo'yuna' ñequio na jnda seijndaa'ñê na nnts'aaⁿ ndo' cwiluiina' cha'xjeⁿ na cjaawee' ts'oom. ¹² Luaa' waa na mach'eeⁿ cha jâ nn'aⁿ judíos na ñentyjaa'jndyee n'ooⁿya Cristo, catseit'maaⁿñena' Ty'oots'om cantyja 'naaⁿyâ. ¹³ Ndo' mati 'o nn'aⁿ na nchii judíos quia na jndye'yo' ñ'oom na mayuu' cantyja 'naaⁿ Cristo, majuu ñ'oomxco naya na macwji'n'maaⁿñena' 'o, jla'yu'yo' ñ'eñê, jo' na jñoom sayo 'o ñequio Espíritu Santo na tsoom na nnto'ñoom'yo'. ¹⁴ Manquii Espíritu Santo na tjamei'ntyjee' nnom ñ'oom na cwiljotyeⁿ na maxjeⁿ nnto'ñōoⁿya ljo' na ñnequiaa Ty'oots'om ndaaya quia na jnda seicandyaañeñ'eeⁿ nn'aⁿ na

nla'xmaⁿ cwentaaⁿaⁿ, cha na catseit'maaⁿñena' jom na jeeⁿ t'maⁿ cwiluiiñê.

Quiaa Ty'oots'om na jndo' n'om nn'aⁿ na cwila'yu'

¹⁵ Cautyja 'naaⁿ nmeiⁿ mati ja quia na mandiiya na cwila'yu'ya n'om'yo' ñequio Ta Jesús ndo' na m'aⁿ'yo' na wi' n'om'yo' cha'tso nn'aⁿ na lju' n'om, ¹⁶ tyoocjomeiⁿntyjaa'a na mañequiaya na quianl'uuaⁿaⁿ cautyja 'naⁿ'yo' quia na matseinaⁿya nnoom. ¹⁷ Ty'oots'om caxuee cwiluiiñê, nqueⁿ na cwiluiiñê Tsotye Jesucristo na matsa'ntjoom jaa, macaⁿa nnoom na cautyja 'naaⁿ Espíritu quiaaⁿ na nla'noⁿ'yo' ñ'oom na ma'mooⁿ ndaaya ndo' yati ntsata'jnaⁿ'yo' jom. ¹⁸ Mati catseicanaaⁿñê naquii' nqueⁿ'yo' cha na nndaⁿ nla'noⁿ'yo' ljo' tseixmaⁿ ñ'oom na cwicautyjaa' n'om'yo' na cautyja 'naaⁿ juuna' maqueeⁿñê 'o, ndo' juu na mañequiaaⁿ na cwicandaa nn'aⁿ na laxmaⁿ cwentaaⁿaⁿ, jeeⁿ cajndana' ndo' jeeⁿ t'maⁿ tseixmaⁿna', ¹⁹ ndo' mati quiaaⁿ na caliuuya na jeeⁿcheⁿ ndya' t'maⁿ waa na jneiⁿ. Ñequio juu najndeii na matseixmaaⁿ nndaⁿ nnteijneiⁿ jaa nn'aⁿ na cwila'yu'u'a ñ'eⁿñê. Ndo' cautyja 'naaⁿ juu najneiⁿ luaa', ²⁰ s'aaⁿ na tando'xco Cristo na tue', ndo' s'aaⁿ na tjacjoo ntyjaa' ts'ooⁿ ntyjaya la'ñeⁿ cañoom'luee, ²¹ tqueeⁿ juu na t'maⁿti cwiluiiñê nchiiti cha'tso na cwiluiitquiendye ndo' mati jo ndaaⁿ cha'tso na cwitsa'ntjom na m'aⁿ cañoom'luee ñequio cha'tso na waa najnda. Juu cwiluiit'maⁿñeti jo ndaaⁿ cha'tso na m'aⁿ je' ndo' mati 'io cha. ²² Mati s'aaⁿ na cha'tso nnom c'om nacje 'naaⁿ juu ndo' s'aaⁿ na juu cwiluiiñê xqueⁿ ñ'oom jo nnom tmaaⁿ nn'aⁿ na macwji' Ty'oots'om cwentaaⁿaⁿ, ²³ ee tmaaⁿ nn'aⁿ na macwji' Ty'oots'om cwentaaⁿaⁿ cwiluiiñena' seii' Cristo ndo' matseicandaaⁿñeñ'eⁿna' jom nc'e juu tmaaⁿñeeⁿ ndo' cha'tso na niom, candaⁿ laxmaⁿna' nc'e Cristo.

Cwilui'n'maaⁿndyo nc'e na jeeⁿ wi' ts'om Ty'oots'om jaa

2 ¹ Mañejuu xjeⁿ na tqiaa Ty'oots'om na ta'ndo' xco Cristo tqiaaⁿ na 'o tando'yo' meiiⁿ na jo nnoom tyola'xmaⁿ'yo' l'oo nc'e natia ñequio jnaⁿ na ñeja'xmaⁿ'yo', ² mati 'o ñet'om'yo' naquii' natiameiⁿ, ñesantyjo'yo' ndo' ñel'a'yo' ljo' na cwil'a nn'aⁿ tsjoomnancuewaa, cha'xjeⁿ na l'ue ts'om juu espíritu na waa najndeii na m'aaⁿ naquii' jndye na maleichuu xjeⁿ 'naaⁿna' nn'aⁿ na tiñe'cal'a chiuu na l'ue ts'om Ty'oots'om. ³ Mati tiempo na jnda teinom ñeja'jomndyo naquii' cha'tso natiameiⁿ, ñel'aaya ljo' na queeⁿ n'om seii'a ndo' ñeja'candaⁿndyo ñ'omtiuu 'naaⁿya. Ndo' na ljo' ñel'aaya, juu na matseiw'iityeⁿ Ty'oots'om nn'aⁿ laxmaaⁿya na cat'uiina' jaa cha'xjeⁿ na nnt'uiina' nt'omcheⁿ. ⁴ Saa jeeⁿcheⁿ ndya' wi' ts'om Ty'oots'om jaa. T'maⁿ waa na candya' ts'oom ñ'eⁿndyo, ⁵ ee xjeⁿ na ñet'ooⁿya na l'oo nc'e jnaaⁿya, xjeⁿñeeⁿ tqiaaⁿ na tandoo'xcooya quia na tqiaaⁿ na tando'xco Cristo. Ndo' na ljo', nc'e naya na matseixmaaⁿ, jo' na cwiluii'n'maaⁿndyo'.

⁶ Ndo' na tyolaxmaaⁿya l'oo tquiaaⁿ na tandoo'xcooya ñequio Cristo Jesús, ndo' s'aaⁿ na cwimeinⁿdyuaandyo ñ'eⁿñe cañoom'luee. ⁷ Luaa' s'aaⁿ cha xuee na cwiwjaana' m'moⁿna' na juu na m'aaⁿ na jnda ntyjeeⁿ jaa, jeeⁿ cajnda tseixmaⁿna' ñequio juu naya na matseixmaaⁿ nc'e Cristo Jesús. ⁸ Nc'e naya 'naaⁿ Ty'oots'om na cwe' yu, jo' chii cwicaluii'n'maaⁿndyo' ee na cwila'yu'ya' n'om'yo' ñ'eⁿñê. Meiⁿ nchii laxmaⁿyo' na ljo' nc'e cwii na jnda l'a' ncjo'yo', laxmaⁿyo' naljo' nc'e mach'eeⁿ na cwicanda'yo' juuna'. ⁹ Nchii cwe' waa na jnda s'aa ts'aⁿ jo' na cwilui'n'maaⁿñê, cha nntseicu'na' na nntseis'añe cheⁿnqueⁿ. ¹⁰ Ee cwiluiindyo ts'iaaⁿ na mach'ee Ty'oots'om. Jnda tqueeⁿxcoom jaa cantyja 'naaⁿ Cristo Jesús cha na cal'aaya cha'tso nnom na maty'iomyana' na ndyu'ñeeⁿcheⁿ seijndaañê na cal'aaya.

Cwiljoyaandyo ñ'eⁿ Ty'oots'om nc'e na tue' Cristo

¹¹ Jo' chii cjañjoom' n'om'yo' chiuu ñejla'xmaⁿyo' cwiťjoocheⁿ na cwila'yu'yo'. 'O nchii tsjaaⁿ judío 'o ndo' nc'e naljo' joona na cwil'ana 'naaⁿ ntjaaⁿ yo'ndaa ndana na naⁿnom, cwiluena na 'o tila'xmaⁿyo' cwentaa' Ty'oots'om nc'e na tiquil'a'yo' naljo'. ¹² Tiempo'ñeeⁿ nchii cantyja 'naaⁿ Cristo ñet'om'yo', ñet'om'ndyo'yo' cantyja 'naaⁿ nn'aⁿ Israel, ee watōⁿ tyom'aⁿyo' cantyja 'naaⁿ ñ'oomtyeⁿ na seijndaañê Ty'oots'om ñequiondye joona, ndo' mati ñ'oom na tsoom ndaana na nnts'aaⁿ. Xjeⁿñeeⁿcheⁿ meiⁿ ticantyyaa' n'om'yo' jom, meiⁿ na nnc'om'yo' cantyja 'naaⁿaⁿ. ¹³ Saa je' je' tjoom' m'aⁿyo' ñ'eⁿ Cristo Jesús. Jo' chii 'o na ñet'om'ndyo'yo' ñ'eⁿ Ty'oots'om jnda seicandyooñena' 'o cantyja 'naaⁿaⁿ nc'e na tquiaañe Cristo na tueeⁿeⁿ cwenta'yo'. ¹⁴ Ee Cristo cwiluiiñê na cwiljoya n'ooⁿ jâ nn'aⁿ judíos ñequio 'o na nchii jo' cwiluiindyo'. Jom s'aaⁿ na ñecwii tmaaⁿ laxmaaⁿya na ñet'ooⁿya na we tmaaⁿ jaa, ee seityueeⁿeⁿ juu na ñet'ooⁿ na wjeendyo ntyjaaⁿ cwii na cha'cwijom tatiom na ñetoⁿna' jaa. ¹⁵ Ñ'oom na tqueⁿ Moisés jndye nnom tyoqueⁿna' xjeⁿ nn'aⁿ. Saa cantyja na tue' Cristo seintycwiina' najndei na tyotseixmaⁿ ñ'oom'ñeeⁿ. S'aaⁿ na ntycwii jo' cha we ntmaaⁿndyo nncwil'uee'ñê na nnts'aaⁿ cwii tmaaⁿ xco na tjoom' m'aaⁿya cantyja 'naaⁿaⁿ. Laa'ti' waa na seintycweeⁿ na ticuee' n'om nn'aⁿ cwii cwii tmaaⁿ nc'iaana. ¹⁶ Nc'e na tue' Cristo nacjoo' ts'oom'naaⁿ jo' na seintycwiiñeeⁿ na m'aⁿntiaa'ndye we ntmaaⁿ nn'aⁿ, s'aaⁿ na ñecwii tmaaⁿ joona, ljoyaandyena ñ'eⁿ Ty'oots'om.

¹⁷ Jndyo Cristo na jndyonquiaaⁿ ñ'oom xco na mach'eena' na cwintycwii tia' quii'ntaaⁿ 'o nn'aⁿ na tquia ñet'om'yo' cantyja 'naaⁿ Ty'oots'om, ndo' mati quii'ntaaⁿ jâ nn'aⁿ judíos na candyoo'ti ñet'ooⁿya cantyja 'naaⁿaⁿ. ¹⁸ Nc'e cantyja 'naaⁿ Cristo jo' na meiiⁿ we ntmaaⁿ jaa, wanaaⁿ na nntsaquiaa'a na m'aaⁿ Ty'oots'om, cwiluii na ljo' nc'e Espíritu Santo. ¹⁹ Jo' chii 'o nn'aⁿ gentiles tacola'xmaⁿyo' nn'aⁿ na cwe' cwiquieya cwii tyuaa na nchii jo' tuiindyo'. Xeⁿ nchii je' je' mañecwii

xjeⁿ cwiluiindyoy' ñequio tmaaⁿ na cwiluiñe cwentaa' Ty'oots'om, cwiluiindyoy' nn'aⁿ na ñecwii w'aa 'o, ndo' ñequii 'ñeeⁿ ntseinda 'o. ²⁰ 'O cwiluiindyoy' cha'cwijom w'aa na jnaⁿna' nacjoo' ts'iaⁿtsjo', na tacatyeeⁿ nacjoo' ñ'oom na tyoñequia apóstoles ñequio profetas. Manquiiti Jesucristo cwiluiñe tsjo' nqui w'aa'ñeeⁿ. ²¹ Cristo cwiluiñe tsiaⁿtsjo'ñeeⁿ. Nacjoo' juuna' cha'waa w'aa'ñeeⁿ cwijom wjaacandaa'na' hasta na ncue'ntyjo na nluiñena' cwii wats'om na lju' cwentaa' Ta Ty'oots'om. ²² Jo' chii cha'tsondyo' 'o na seitjoom'na' ñ'eⁿ Cristo matseitjomna' 'o ñ'eⁿ nc'iaa'yo' na cwiluiindyoy' cwii w'aa yuu na nnc'oomñe Ty'oots'om nc'e Espíritu Santo.

To'ñom Pablo ts'iaaⁿ na nnts'aaⁿ

3 ¹ Jnaaⁿ ñ'oommeiⁿ, jo' na ja Pablo m'aaⁿya praso cantyja 'naaⁿ Cristo Jesús cha catejndeina' 'o nn'aⁿ gentiles, ² Nc'e na jeeⁿ yañe Ty'oots'om, matsona' na manquiuyoy' na tquiaaⁿ ts'iaaⁿwaa na cats'aaya juuna' naquii'ntaaⁿyo' cha na catejndeina' 'o. ³ Ee t'mooⁿ nooⁿya ñ'oom na jeeⁿ wanty'iuu' ñetuaa chiuu jnda seijndaa'ñê, ndo' tquiaaⁿ na catsei'noⁿa juuna'. Chjoowi' ñ'oom'ñeeⁿ jnda seiljeiya na matseicwanooⁿya na m'aⁿyo'. ⁴ Quia nla'naⁿyo' juuna' quia jo' nla'noⁿyo' na matsei'noⁿa ñ'oom na wanty'iuu' ñetuaa cantyja 'naaⁿ Cristo. ⁵ Juu na jeeⁿ wanty'iuu' ñetuaa tñquiaa Ty'oots'om na nliu nn'aⁿ na ñet'om teiyo juuna', cha'xjeⁿ je' ñequio Espíritu Santo jnda t'mooⁿ ndaa apóstoles na lju' n'om ñequio profetas. ⁶ Luaa waa ñ'oom na wanty'iuu' ñetuaana': Nn'aⁿ na nchii judíos joona, juu na nnts'aa Ty'oots'om na ndaa nn'aⁿ judíos, mati nnto'ñoomna. Matseitjoom'na' joona ñequio seii' Cristo, mati mañ'oomna' joona naquii' ñ'oom na tso Ty'oots'om na nnts'aaⁿ cantyja 'naaⁿ Cristo Jesús.

⁷ Macantya 'naaⁿ ñ'oomwaa' jo' na s'aa Ty'oots'om na jndaya na mañequiaya juuna' ndaa nn'aⁿ, ndo' tquiaaⁿ najndeii na matseixmaaⁿ na ñ'eⁿ mats'aaya tsiaaⁿwaa'. ⁸ Quii'ntaaⁿ cha'tsondye nn'aⁿ cwentaa' Ty'oots'om na tit'maⁿ cwiluiindyey, cantyja 'naⁿya, ja tit'maⁿndyotyā, nchiiti joona. Saa meiiⁿ na ljo', nooⁿ ja tquiaaⁿ ts'iaaⁿ na catseicandiiya nn'aⁿ na nchii judíos na cha'tso na matseixmaⁿ Cristo jeeⁿ cajndana' meiⁿ xocandaa nntsei'noⁿ ts'aⁿ. ⁹ Ndo' ty'ioom ts'iaaⁿ ja na cats'aaya na c'ooliu nn'aⁿ chiuu nncwji'n'maaⁿñê 'o nn'aⁿ na nchii tuiindyoy' judíos. Quia na jnaⁿjndyeecheⁿna' na s'aa Ty'oots'om cha'tsoti na maniom seijndaa'ñê na luaa' nncuaa, saa hasta quia je'cheⁿ matseicanooⁿ na ljo', ¹⁰ cha cantyja 'naaⁿ juu tmaaⁿ nn'aⁿ na macwji' Ty'oots'om cwentaaⁿaⁿ cha'tsondye na cwiluiitquiendye na m'aⁿ cañoom'luee ñequio cha'tso na cwitsa'ntjom jo' jo', caliuna na jndye nnom na jndo' ts'om Ty'oots'om. ¹¹ Ty'oots'om s'aaⁿ cha'tso nmeiⁿ cha'xjeⁿ nqueⁿ jnda seijndaa'ñê na ticantycwii na l'ue ts'oom na nncuaa, ndo' seicandaa'ñena' naljo' ee Taya Jesucristo. ¹² Ndo' nc'e na cwila'yuyā n'ooⁿ ñ'eⁿ Jesucristo ndo'

cwicantyjaa' n'ooⁿya jom, jo' na matseicanaaⁿñena' na cwila'candyoo'ndyo na m'aaⁿ Ty'o^oots'om. ¹³ Jo' chii macaⁿ'a ndaa'yo' na tintsei'ndaa'na' nqui'yo' nawil' na matjoⁿya cantyja 'naⁿ'yo' ee na ljo', matseit'maaⁿñena' 'o.

Cristo candya' ts'oom jaa

¹⁴ Macwe' jo' na maco'a xtyaya jo nnom Tsotye Taya Jesucristo, ¹⁵ na cantyja 'naaⁿ' jom cha'tso yo na m'aⁿ cañoom'luee ñequio yo na m'aⁿ tsjoomnancue, cwilcwii'na xueⁿ'eⁿ na cwiluiiñê Tsotyena. ¹⁶ Nquii Tsotyaaⁿ waa na jeeⁿ cajnda na tjaa ljo' cwii macaⁿ'na' na matseixmaaⁿ. Macaⁿ'a na cantyja 'naaⁿ' joona', naquii' n'om'yo' ñequiaaⁿ na nnaⁿndyo' ndo' nla'xmaⁿ'yo' najndeii na cwiluiiñê nc'e Espíritu, ¹⁷ cha nndaⁿ nnc'oomñe Cristo naquii' n'om'yo' nc'e na cwila'yu'ya n'om'yo' ñ'eⁿñê cha caljotyeⁿ na m'aⁿ'yo' naquii' na m'aaⁿ Ty'o^oots'om na wi' ts'om 'o, cha'xjeⁿ njoom ty'e nch'ioo' ts'oom. ¹⁸ Mati macaⁿ'a nnom Ty'o^oots'om na cala'n^o'ya'yo' ñequio cha'tsondye nn'aⁿ na cwila'yu' cwanti na t'maⁿ na m'aaⁿ Cristo na wi' ts'oom nn'aⁿ, ndo' na tco, ndo' na njoom, ndo' na ndye. ¹⁹ Juu na m'aaⁿ Cristo na wi' ts'oom 'o luaa, macaⁿ'a na cala'n^o'yo' na waljoo'cheⁿ na t'maⁿ'na', ndo' na luaa' nla'n^o'yo' jo' na nnc'om'yo' na chawaañ'eⁿ naquii' n'om'yo' m'aaⁿñe Ty'o^oots'om.

²⁰ Catseit'maaⁿñena' Ty'o^oots'om na jom jndyeti nndaⁿ nnts'aaⁿ nchii cwe' cha'xjeⁿ cwitaaⁿ jaa meiⁿ nchii cwe' cha na cwila'tiuutyaaⁿyo' ndo' na mateijneiⁿ jaa nc'e najndeii na matseixmaaⁿ m'aaⁿ'na' naquii' n'ooⁿya. ²¹ Jom catseit'maaⁿñena' naquii' tmaaⁿ' nn'aⁿ na macwji' Ty'o^oots'om cwentaaⁿ'aⁿ nc'e Cristo Jesús cha'tso ndyu ndo' cha'waati xuee na cwii wjaatina'. Amén.

Tjoom' m'aⁿ'yo' nc'e Espíritu Santo

4 ¹ Ja m'aaⁿya w'aancjo jnaaⁿ' na cwiluiindy^o ts'aⁿ na m'aaⁿñe cantyja 'naaⁿ' Jesucristo, mats'aaya ty'oo ndaa'yo' na c'om'yo' quii'ntaaⁿ nn'aⁿ cha'xjeⁿ na macaⁿ'na' na c'om nn'aⁿ na maqueeⁿ'ñe Ty'o^oots'om cwentaaⁿ'aⁿ ee mancjo'yo' jo'. ² C'om'yo' na nioom' n'om'yo' ndo' yann'aⁿndyo', c'om'yo' na t'maⁿ n'om'yo', canaⁿndyo' ñ'eⁿ nc'iaa'yo' ñequio na wi' n'om'ntyjee'yo'. ³ Ñequio na mateijndeii Espíritu Santo 'o, calajnda'yo' na ñecwii n'om'yo' ñequio nn'aⁿ na cwila'yu' nc'e na matseitjoom'na' 'o na ya m'aⁿ'yo' ñequiondye joona. ⁴ 'O nc'e Cristo ñecwii sei' cwiluiindy^o ndo' ñecwii Espíritu Santo na m'aaⁿñê naquii' n'om'yo', cha'xjeⁿ jnda tqueeⁿ'ñe Ty'o^oots'om 'o na ñecwii waa na cwicantyjaa' n'om'yo', ⁵ m'aaⁿ ñecwiiñe Jesucristo na cwiluiiñê na matsa'ntjoom, ndo' ñecwii na cwila'yu'ya n'ooⁿya ñ'eⁿñê, ndo' ñe'cwii na cwileits'oomndye nn'aⁿ cantyja 'naaⁿ'aⁿ, ⁶ ndo' m'aaⁿ ñecwii Ty'o^oots'om na nqueⁿ cwiluiiñe Tsotyaaⁿ na cha'tsondyo, jom

cha'tso matsa'ntjoom ndo' mach'eeⁿ ts'iaaⁿ 'naaⁿ'aⁿ naquii' n'ooⁿya ndo' m'aaⁿñê jo' jo'.

⁷ Cwii cwiindyö cantyjati na jnda jndaa' nnom Cristo na 'naaⁿ ts'iaaⁿ na matseixmaⁿ, cantyjati jo' naya na maco'ñom. ⁸ Nc'e na luaa' jo' matso ñ'oom' Ty'oöts'om na teiljeii:

Quia na tjawaaⁿ cañoom'luee jnda na tando'xcoom na tueeⁿeⁿ,
tjachom cha'tso joo na ñet'om nacjoom'm,

ndo' ndaaⁿ nn'aⁿ tquiaaⁿ cwii cwii nnom na 'naaⁿna.

⁹ ¿Ljo' ñe'ca'moⁿna' na matsona' na tjawaaⁿ? Matsona' naljo' ee najndyee jndyocueeⁿ nnom tsjoomnancuewaañe. ¹⁰ Jom na jndyocueeⁿ majuityeeⁿ tjawannaaⁿ'aⁿ cañoom'luee cha na cha'tsoti na niom, candaⁿ ma'moⁿna' na m'aaⁿñê. ¹¹ Ndo' manquiiyeeⁿ tquiaaⁿ na nt'om nn'aⁿ cwiluiindyö apóstoles. Nt'om cwiluiindyö nn'aⁿ na cwit'mooⁿ ñ'oom cantyja 'naaⁿ'aⁿ cha cala'yu' nn'aⁿ. Nt'om cwiluiindyö na cwiñe'quia ñ'oom xco na ya cantyja na nlui'n'maaⁿñe ts'aⁿ, ndo' nt'om cwiluiindyö na cwitei'x'ee ntmaaⁿ nn'aⁿ na macwji' Ty'oöts'om cwentaaⁿ'aⁿ ndo' nt'omcheⁿ cwito'ñoom na 'naaⁿ na cwit'mooⁿ ndaaⁿ nc'iaa. ¹² Luaa' s'aa Cristo, jo' na ya tei'naaⁿ nn'aⁿ na cwila'xmaⁿ cwentaaⁿ'aⁿ na nl'ana ts'iaaⁿ na maca'na' cha na nncjaawijndyendye nn'aⁿ na nnc'om cantyja 'naaⁿ'aⁿ, ¹³ hasta xjeⁿ na nncue'ntyjo na cha'tsondyö tjoom' nnc'oöⁿya na cwila'yu'ya n'ooⁿya ñ'eⁿñê ndo' na candaⁿ'ya na cwita'jnaaⁿ'a nquii Jnda Ty'oöts'om. Ndo' na ljo' nlaxmaaⁿya nn'aⁿ na jnda tquiee n'om na candaⁿ' nntseijomna' jaa cantyja 'naaⁿ Cristo. ¹⁴ Quia jo' taxocatseijomnnda'na' jaa cha'na yocanch'u na tiyo yo cwila'chuii' chiuu waa na m'aaⁿ n'om. Meiⁿ taxonquiandyö na nlechuuna' jaa cantyja 'naaⁿ ñ'oom xco na cwe' cantu na cwiñe'quia nn'aⁿ na jeeⁿ jndo' n'om na joo ñ'oom'ñeeⁿ cwi'oochoondyena' nn'aⁿ nato na tixcwe. ¹⁵ Quia jo' nc'e na wi' n'ooⁿya nn'aⁿ, calanaⁿ'ya ñ'oom na mayuu', matsona' na catsanajndaⁿya cantyja 'naaⁿ cha'tso nnom chiuu waa na m'aaⁿya nc'e na matseitjoom'na' jaa ñ'eⁿ Cristo na cwiluiñê xqueⁿ tmaaⁿ jaa na laxmaaⁿya seiiⁿeⁿ. ¹⁶ Ndo' cantyja 'naaⁿ Cristo, jaa na cwiluiindyö seiiⁿeⁿ, matseijomna' cha'na tjacañjoom'ñe seii' ts'aⁿ, ndo' juu jo' quia ya t'uii'na' ñequio cwii cwii nnom na tjacañjoom'ñe ts'aⁿ, quia jo' tjoom' m'aaⁿna', ndo' nc'e jo' ya wjanajndeii juuna'. Ndo' jaa na cwiluiindyö seiiⁿeⁿ, nntsawijndaⁿya na wi' n'ooⁿya nn'aⁿ.

Cwiluiindyöxcoö na cwila'yuu'a ñ'eⁿ Cristo

¹⁷ Jo' chii nc'e nquii Ta Jesús matsa'ntjoom jaa, luaa ñ'oom na matsjoo ndaa'yo'. Tsacwi'ntyje'yo' na matseijomna' 'o cha'na nn'aⁿ na tyootioondye l'ö Ty'oöts'om. Ee joona m'aⁿna ñomtiuu 'naaⁿna na cwe' ts'iaaⁿndyo joona'. ¹⁸ Ee juu na cwila'noⁿna matseijomna' cha'cwijom na jaañe. Ee juu na wando' Ty'oöts'om ticuaana' ñ'eⁿndyena ee

ticala'noⁿ na cantyja 'naaⁿ aⁿ nc'e na quie' n'omna. ¹⁹ Jnda s'aana' na tajnaaⁿ tona natia na cwil'ana, cwiñequiandyena nnom ljo' na queeⁿ ts'om seiina cha ñequio na neiiⁿ na ndaaⁿ nl'añ'eⁿ na cha'tso nnom ljo' na ticaty'iomyana'. ²⁰ Saa 'o nchii luaa' waa ñ'oom na tyot'mooⁿ nn'aⁿ cantyja 'naaⁿ Cristo ndaaⁿ yo', ²¹ xeⁿ na mayuu' jndye'ya'yo' ñ'oom'm ndo' jla'noⁿ yo' na ñ'oom na mayu'cheⁿ juuna', ²² quia jo' cantyja 'naaⁿ chiuu waa na ñet'om'jndyee'yo', catjei'ndyo' cantyja 'naaⁿ natia na ñeseiqueeⁿ ts'om sei'yo' ee juu jo' tseixmaⁿ na' cwii na jndaⁿ tei'ndaa'ñ'eⁿ na joo natia'ñeeⁿ cwinquio'nn'aⁿ na' ts'aⁿ. ²³ Macaⁿ na' na cala'xco'yo' cantyja 'naaⁿ espíritu 'naⁿ yo' ñequio na m'aaⁿ n'om'yo', ²⁴ ndo' na c'omxcondyo' cha'cwijom ts'aⁿ na macwee liaa xco na juu jo' cwiluiñena' cantyja na l'ue ts'om Ty'ooots'om na cwiwitquioo' jo' quia na mach'ee ts'aⁿ na maty'iomyana' ndo' lju' wjaam'aaⁿ.

²⁵ Jo' chii tacalaneiⁿ yo' cantu, cwii ndo' cwiindyo' catseineiⁿ ñ'oom na mayuu' ñ'eⁿ nc'iaa' ee cha'tsondyoⁿ cwiluiindyoⁿ cwii cwii nnom ljo' na tjacañjoom'ñe seii' Cristo.

²⁶ Quia matsei'w'ii' x'ia', tintseitjoondyu'ti' nnoom na jndaa'jom nntseicamaaⁿ ndyu' na tincja'cwaaⁿ ya' jom. ²⁷ Tiñenquia'yo' meiⁿ cwii nnom na tsaⁿ jndii ndaaⁿ nnts'aaⁿ xjeⁿ 'o.

²⁸ Ñeeⁿ 'o na ñex'uee, je' tanch'ueeti, je' cats'aayaaⁿ ts'iaaⁿ na yati cha nncuaa ljo' na ndaaⁿ nnteijneiⁿ nt'omcheⁿ na matseitjoona' joona.

²⁹ Meiⁿ cwii ñ'oomntjeiⁿ talaneiⁿ yo', macandaⁿ calaneiⁿ yo' ñ'oom naya na nnteijndeina' ts'aⁿ na nncjaawijndeityeeⁿ, ndo' nn'aⁿ na ndye ñ'oom'ñeeⁿ nntio'naaⁿ ñena' joona. ³⁰ Ndo' til'a'yo' cwii nnom na nntseichjoo'na' ts'om Espíritu Santo na cwiluiñe Ty'ooots'om, nquii na ñequio juu ty'iroom sayo 'o, cha jndaa' 'ñeeⁿ 'o xuee quia na nnlui'n'maaⁿ ndyeñ'eⁿ nn'aⁿ.

³¹ Ca'ndye'yo' cha'tso nnom na cwil'a na matsei'ndaa'na' n'om'yo', cha'na nntseiw'ii' ts'aⁿ x'iaaⁿ aⁿ, nntseiloo'ñe ts'aⁿ ñ'eⁿ x'iaaⁿ aⁿ, c'uaa c'uaati 'ñom na matseijmeiⁿ ñê nnom x'iaaⁿ aⁿ, maju' ts'aⁿ ñ'oom wi' nacjoo' x'iaaⁿ aⁿ, ñequio chatso nnom ljo' na tis'a. ³² Cal'a'yo' na ya nn'aⁿ ndyo' ñ'eⁿ nc'iaa'yo', c'oom na wi' n'om'yo' joona, cala't'maⁿ n'om'yo' nc'iaa'yo' cha'xjeⁿ mati matseit'maⁿ ts'om Ty'ooots'om 'o nc'e Cristo.

Luaa macaⁿ na' na c'om ntseinda Ty'ooots'om

5 ¹ Nc'e na cwiluiindyo' ntseinda Ty'ooots'om na m'aaⁿ na jeeⁿ candya' ts'oom 'o, jo' na macaⁿ a na caluii'ndyo' cha'xjeⁿ nqueⁿ. ² C'om'yo' na jnda nquiu'yo' meiⁿ quia nn'aⁿ cha'xjeⁿ Cristo ty'oom na candya' ts'oom jaa, ndo' tquiaañe na tueeⁿ eⁿ cwentaaya. Ndo' na ljo' s'aaⁿ s'aana' ntyjii Ty'ooots'om ñ'eⁿ ñê cha'cwijom catsmaⁿ na cwila'cueeⁿ nn'aⁿ judíos cha nntseit'maⁿ ts'oom joona jnaaⁿ na. Manc'e jo' chii tiao na jeeⁿ tjawee' ntyjii Ty'ooots'om ñ'eⁿ ñê cha'cwijom cwii jndye cachi.

³ Saa quii'ntaaⁿ 'o na cwiluiindyoy' nn'aⁿ cwentaa' Ty'oots'om ticatsona' meiⁿ cwe' na nlaneiⁿyo' ñ'oom cantyja 'naaⁿ na cwe' nnc'oomya ts'aⁿ ñ'eⁿ x'iaa' ndo' cha'tso nnom ñ'oomtia, oo aa queeⁿ ts'om ts'aⁿ na ñe'cwityañê. ⁴ Ticaty'iomna' na nlaneiⁿyo' meiⁿquia nnom ñ'oom ntjeiⁿ oo ñ'oom wi', oo ñ'omjnaaⁿ na cwila'neiⁿ nn'aⁿ. Nchii jo' na nl'a'yo'. 'O cjaañjoom' n'om'yo' cwii cwii nnom na cantyja 'naaⁿ joo jo' ññe'quia'yo' na quianl'uaa' Ty'oots'om. ⁵ Ee manquiu'yo' na juu ts'aⁿ na cwe' nnc'oomya ñequio x'iaa' oo na nntseiqueeⁿ ts'om na ñe'cwityañê, jo' jo' matseijomna' cha'na quia na matseit'maaⁿñe ts'aⁿ cwii na cwe' nn'aⁿ nl'a, ndo' na ljo' nntseicu'na' na nncjaaquiee' ts'aⁿñeeⁿ cantyja na matsa'ntjom Cristo ñ'eⁿ Ty'oots'om. ⁶ Meiⁿcwii ts'aⁿ tinqui'nn'aⁿyo' na nndu'yo' ñ'oom ntjeiⁿ nnom, ee macwe' jnaaⁿ jo' juu na t'maⁿ nntseiw'ii Ty'oots'om nnt'uiina' nn'aⁿ na tilañ'oom'ndyena chiuu na matseicañeeⁿ joona. ⁷ 'O til'a'yo' cha'xjeⁿ na cwil'ana.

⁸ Ee 'o jnda ñet'om'yo' cantyja 'naaⁿ na jaaⁿñe saa je' na jnda seitjoom'na' 'o ñequio Ta Jesucristo, c'om'yo' cantyja 'naaⁿ naxueeñe, ⁹ ee juu naxueeñe quia na matseixueeñena' naquii' ts'om ts'aⁿ, mach'eena' na yats'aⁿñê, xcwe mach'eeⁿ ndo' mayom'm ñ'oom na nntseineiⁿ. ¹⁰ Cala'jnda'yo' na nntsawi'naⁿyo' na nl'a'yo' cha'tso yuu na macjaawee' ntyjii Ta Jesús ñ'eⁿndyo'. ¹¹ Ticala'jomndyo' ñequio ljo' na tjaa yuu l'ue na cwil'a nn'aⁿ na m'aⁿ cantyja 'naaⁿ na jaaⁿñe. 'O cala'canooⁿyo' na tixcwe ljo' cwil'ana. ¹² Ee mach'eena' na jnaaⁿ ts'aⁿ na nntseineiⁿ ljo' na cwe' nty'iu cwil'a naⁿñeeⁿ, ¹³ saa quia na jnda seicanooⁿ naxueeñe cha'tso ljo' na cwe' nty'iu cwiluii, quia jo' cwiwitquioo'ya. Ee juu naxuee matseicanooⁿna' cha'tsoñ'eⁿ ljo' na wanty'iuu' niom. ¹⁴ Cantyja 'naaⁿ luaa', luaa matsona':

Calcwi' 'u na watsu',

quicantya' na wa' qui'ntaaⁿ l'oo

cha na ñnequiaa Cristo na xuee nnc'oom'.

¹⁵ Cantyja 'naaⁿ nmeiⁿ cal'andyo' cwentaa cantyja chiuu waa na tsam'aⁿyo'. Tinc'om'yo' na cwe' tijndo'to n'om'yo', 'o c'om'yo' na jndo'ya n'om'yo'. ¹⁶ Jo' chii queⁿndyo' na nl'a'yo' yuu na maty'iomyana'. Meiⁿ tila'catsuu'yo' xuee 'naⁿyo' na cwe' chutindyo, ee cwii cwii xuee jaawiwi'ti. ¹⁷ Til'a'yo' cwii nnom na cwe' nl'a'to'yo', cala'noⁿya'yo' ljo' l'ue ts'om Ta Ty'oots'om na nl'a'yo'. ¹⁸ Tinc'om'yo' na candye'yo', ee na luaa' nl'a'yo' wjaachuna' 'o na nntsuundyo', 'o c'om'yo' na too'ndyo' ñ'eⁿ Espíritu Santo. ¹⁹ Cala'naⁿyo' ñ'oom na cho salmos na ndye'yo' ñ'eⁿ nc'iaa'yo' ndo' cata'yo' cha'tso nnom na ya nnta ts'aⁿ na cwila't'maaⁿndyo' Ta Ty'oots'om ñequio na xcwee'ya n'om'yo'. ²⁰ Ñequii'cheⁿ quia'yo' na quianl'uaa' Tsotyaa'ya Ty'oots'om cantyja cha'tsoti na matio'ñaaⁿñê 'o ñequio xuee' Taya Jesucristo.

N'oom cantyja 'naaⁿ nn'aⁿ na t'unco.

²¹ Catue'ndyo' cje'yo' ndaa nc'iaa'yo' na cwila'yu' nc'e na t'maⁿñe Ty'o^ots'om nqui^u'yo'.

²² 'O yolcu na m'aⁿ s'aa'yo' cal'a'yo' ljo' na l'ue n'omna cha'cwijom cwindye'ntjom'yo' nnom nqui Ta Jesucristo. ²³ Ee tsaⁿs'a cwiluiñê xqueⁿ scoom'm, cha'xjeⁿ Cristo cwiluiñê xqueⁿ tmaaⁿ nn'aⁿ na macwji' Ty'o^ots'om cwentaaⁿaⁿ ndo' na macwji'n'maaⁿñê tmaaⁿñeeⁿ, ee cwiluiñena' seiiⁿeⁿ, ²⁴ ndo' cha'xjeⁿ t'maaⁿ nn'aⁿ na cwila'yu' maju'ñecje nnom Cristo, maluaa' macaⁿna' na joo yolcu na jnda t'unco catuee'ndyecjena ndaa s'aana.

²⁵ Naⁿnom na m'aⁿ lcuu c'omna na jnda nquiuna joo cha'xjeⁿ Cristo ty'loom na candya' ts'oom tmaaⁿ nn'aⁿ na macwji' Ty'o^ots'om cwentaaⁿaⁿ ndo' na tqiaaⁿñê na tueeⁿeⁿ cwentana. ²⁶ Luaa' s'aaⁿ cha na nntseixmaⁿ tmaaⁿñeeⁿ cwentaa' Ty'o^ots'om ndo' tqueⁿ lloom'm juuna' quia na teits'oomndyena ndo' ñequio na tyondyena ñ'oom'm, ²⁷ cha ñequiaa cheⁿnqueⁿ tmaaⁿñeeⁿ nnoom na neiⁿncoo' caxuee tseixmaⁿna', na tjaa yuu na cwajndii cantyja 'naaⁿna' meiⁿ tjaa'naⁿ na cantseiiⁿna' meiⁿ tjaa cwiicheⁿ na nljei' na ticuaaya cantyja 'naaⁿna', na ñequii'cheⁿ tseixmaⁿna' cwentaa' Ty'o^ots'om ndo' candaⁿñeⁿ matseixmaⁿna' cwentaaⁿaⁿ. ²⁸ Maluaa' waa na matsona' na c'oom tsaⁿs'a na wi' ts'oom scoom'm cha'xjeⁿ jnda ntyjeeⁿ seiiⁿeⁿ. Ee ts'aⁿ na wi' ts'om scuu' ma'moⁿ na jnda ntyjiiñe cheⁿnquii. ²⁹ Ee tjaa 'ñeeⁿ quich'ee na jndooñe cheⁿnquii. Macwaaⁿaⁿ nantquie cha nnc'oom na yaaⁿaⁿ. Ndo' cha'xjeⁿ Cristo mach'eeⁿ cwentaa jaa tmaaⁿ nn'aⁿ na macwji' Ty'o^ots'om cwentaaⁿaⁿ, maluaa' matseijomna' na cateix'ee ts'aⁿ scoom'm. ³⁰ Ee jaa tmaaⁿ nn'aⁿ na macwji' Ty'o^ots'om cwentaaⁿaⁿ, cwiluiindy^o seii' Cristo na cha'waañê. Ndo' cwii cwiindy^o matseijomna' cwii cwii nnom na matseicañjoom'na' jom. ³¹ "Jo' chii tsaⁿs'a n'ñeeⁿ tsotyeeⁿ tsoñeeⁿ cha na nntseitjoom'na' jom ñ'eⁿ scoom'm ndo' wendyena nla'xmaⁿna' ñecwii ts'aⁿ." ³² Jeeⁿ t'maⁿ matseixmaⁿ ñ'loomwaa' na jeeⁿ wanty'iuu' waana'. Saa ja matseijoom'ndyo ñ'oommeiⁿ cantyja 'naaⁿ Cristo ñequio tmaaⁿ nn'aⁿ na macwji' Ty'o^ots'om cwentaaⁿaⁿ. ³³ Saa ñ'oom na macanda, cwii ndo' cwiindy^o 'o c'oom na jnda ntyjii scuu' cha'xjeⁿ na jnda ntyjiiñe cheⁿnquii ndo' mati 'o naⁿlcu cala'l'uee'ndyo' s'aa'yo'.

Luaa macaⁿna' na c'om nda nn'aⁿ na cwila'yu'

6 ¹ 'O yonch'u, nc'e na cwila'yu'yo' ñequio Jesucristo, laxmaⁿyo' na c'om'yo' na ndyaandy^o jo ndaa nn'aⁿ na nda o' ee maty'iomyana' na nl'a'yo' naljo'. ² Ee ljeii najndyee na matsa'ntjomna' chuuna' ñ'oom na tso Ty'o^ots'om na nnts'aaⁿ. Matsona': "Catseit'maaⁿndyu' tsotyee' ñ'eⁿ tso'ndyo' ³ cha na nnc'oom' na neiⁿ ndo' tco xueechu' nnom

tsjoomnancuewaa.” ⁴ Ndo' 'o je', na m'aⁿ nda'yo' til'a'yo' cwii nnom na nla'líoo'ndyena, 'o cala'quie'yo' joona ñequio ñ'oom na matseijndo'na' n'omna chiuu nnc'omna ndo' cat'moⁿ'yo' ndaana na candya' ts'om Ta Jesucristo joona.

Ñ'oom cantyja 'naaⁿ nn'aⁿ na teil'uandye na cwindye'ntjomtyeⁿ

⁵ 'O nn'aⁿ na teijndandyo', c'om'yo' na ndyaandyo' ndaa patrom 'naⁿ'yo', catue'ndyo'cje'yo' ndaana ndo' ñequio na nquia'yo' cala't'maaⁿ'ndyo' joona ñequio na xcwee' n'om'yo' cha'xjeⁿ nquiu'yo' na cwindye'ntjom'yo' nnom nquii Cristo. ⁶ Nchii cwe' quia na jndoo'na jo' na cwique'ndyo' ts'iaaⁿ na cwil'a'yo'. 'O cal'a'yo' na ljo' ee na manquiu'yo' na nnom nquii Cristo m'aⁿ'tyeⁿ'yo' moso, ndo' ñequio na xcwee' n'om'yo' cwil'a'yo' yuu na l'ue ts'om Ty'o^ots'om. ⁷ Ts'iaaⁿ na nl'a'yo', cal'a'yo' juuna' ñequio na tinc'uaa' n'om'yo', cha'xjeⁿ nnom nquii Ta Jesucristo na cwindye'ntjom'yo', nchii cwe' ndaa nn'aⁿ.

⁸ Ee manquiu'yo' na cwii cwii ts'aⁿ, aa m'aaⁿ'tyeeⁿ moso oo aa m'aaⁿ xjeⁿ 'naaⁿ' nqueⁿ, saa Ta Jesús ñnequiaaⁿ na nnc'oñom cantyjati na ya na ñes'aa. ⁹ Ndo' 'o je' patrom, majo'ti cal'a'yo' ñequio nn'aⁿ na m'aⁿ'tyeⁿ moso 'naⁿ'yo' meiⁿ nchii na ndu'yo' cwii ñ'oom na ntseicaty'uenal joona. Ee cjañjoom' n'om'yo' na 'o ñ'e'ndye joona cañoom'luee m'aaⁿ Ta Jesús na matsa'ntjoom jaa. Ndo' jo nnom jom ñecwii xjeⁿ cwila'xmaaⁿya.

L'o ts'iaaⁿmeiiⁿ cwil'uee'ndyo

¹⁰ 'O nn'aⁿya, Ta Jesús tjacantyja najndeii na matseixmaaⁿ. Cantyja 'naaⁿ' jo' c'oom' jndeii' n'om'yo' nc'e matseitjoom'na' 'o ñ'e'ñê.

¹¹ Cwil'uee'ndyo' cha'tso nnom l'o ts'iaaⁿ ndia' na jnda tquiaa Ty'o^ots'om ndaa'yo', cha na nndaa nna'ndyo' nacjoo' cha'tso nnom na manquiu'nn'aⁿ tsaⁿjndii 'o. ¹² Ee nchii cwe' ñequio nn'aⁿ na la'xmaⁿ seii ñequio ndeii cwil'aaya tia'. Jaa m'aaⁿya nacjoo najnda na wi'ndye na titquiao' na m'aⁿ jo ndo' ljo'luee, joo na waa najnda na cwiqueⁿ xjeⁿ, na cwi'tsa'ntjom, ndo' nt'omcheⁿ na cwi'tsa'ntjom tsjoomnancue jaa'waañe.

¹³ Jo' chii cwil'uee'ndyo' cha'tsoñ'eⁿ l'o ts'iaaⁿ cwentaa ndia' na mañequiaa Ty'o^ots'om cha quia na nncue'ntyjo xuee na wi' nntjom'yo' nndaa nna'ndyo' ndo' na jnda jndaa jna'ndyo' tia', ndicwaⁿ meiⁿ'ntyje'tyeⁿ'yo'. ¹⁴ Cwintyje'tyeⁿ'yo' cwentaaⁿ'aⁿ na cwil'uee'ndyo' ñ'oom'm cha'xjeⁿ sondaro matseityeeⁿ xcweeⁿ'eⁿ ñequio tjaⁿ, cal'a'yo' na maty'iomyana' ee juuna' nncwañoom'na' 'o cha'xjeⁿ cotom xjo wañoom'na' sondaro. ¹⁵ Cha'xjeⁿ m'aaⁿ'c'eeñe sondaro na mañjoom lcoom'm na wjaⁿ tia', mati 'o ñequi'cheⁿ c'om'c'eendyo' na nntsanquia'yo' ñ'oom na ya na mañequiaana' na cwiljoya ntyjii Ty'o^ots'om ñ'eⁿ nn'aⁿ. ¹⁶ Tsaⁿjndii majoom'm ndo nacjo'yo' na too' chom. Cha'xjeⁿ tjaⁿ tmeiⁿ mawañoom'na' sondaro na tinc'oom ndo jom,

maluaa' cwil'uee'ndyo' juu na cwilayu'ya n'om'yo' cha nlandu'yo' ndo na maju' tsaⁿjndii nacjo'yo'. ¹⁷ Juu na macwji'n'maaⁿñe Ty'ooots'om nn'aⁿ cwil'uee'ndyo' juuna' na nncwañoom'na' 'o cha'xjeⁿ tjaⁿxqueⁿ xjo' mawañoom'na' xqueⁿ sondaro ndo' mati cwil'uee'ndyo' ñ'oom'm cha'xjeⁿ xjo espada na mañequiaa Espíritu Santo ndaa'yo'.

¹⁸ Tintsacwintyje'yo' na cwilaneiⁿyo' nnom Ty'ooots'om cha'xjeⁿ na mañequiaa Espíritu Santo naquii' n'om'yo', ñequii'cheⁿ cala'ty'oondyo' ndo' cataⁿyo' nnoom, tincwintqueⁿyo', ñequii'cheⁿ na c'om'c'eendyo' na calaneiⁿyo' nnoom cantyja 'naaⁿ nn'aⁿ na m'aⁿ cwentaaⁿaⁿ. ¹⁹ Mati calaneiⁿyo' nnom Ty'ooots'om cantyja 'naⁿya na cateijneiⁿ ja ñ'oom na nntseinaⁿya ndaaⁿ nn'aⁿ meiⁿ tintseicaty'uena' ja na ñnequiaya na caliu nn'aⁿ chiuu waa ñ'oom na jeeⁿ wanty'iuu' waa na nlui'n'maaⁿñe ts'aⁿ.

²⁰ Jnda ty'iroom ts'iaaⁿ ja na mañequiaya ñ'oom naya 'naaⁿaⁿ, ndo' cwe' jnaaⁿ jo' na m'aaⁿya w'aancjo, calaneiⁿyo' nnoom na c'oⁿt'maaⁿndyo ts'oⁿya na nntseinaⁿya juuna' ndaaⁿ nn'aⁿ cha'xjeⁿ matsona' na cats'aa.

Ñ'oom na jaantycwii na matseiljeii Pablo cartawaañe

²¹ Ti'nn'aⁿya Tíquico, tsaⁿ na jeeⁿ jnda ntyjiiya, jom jeeⁿ xcwee' ts'oom ts'iaaⁿ 'naaⁿ Ta Jesús, jom ntseicañeeⁿ 'o chiuu waa na m'aaⁿya cha caliu'yo' ljo' mats'aaya. ²² Cwe' jo' na majñooⁿya jom na m'aⁿyo' na catseicañeeⁿ 'o chiuu waa na m'aaⁿya ñjaaⁿ cha na ñnequiaana' na t'maⁿ n'om'yo'.

²³ 'O nn'aⁿya na cwila'yu'yo', nquii Ty'ooots'om na cwiluiiñê Tsotyaaⁿya ñequio Jesucristo na cwiluiiñê na matsaⁿntjoom jaa, quiana na nda'yo' na meiⁿcwii ñomtiuu tic'om'yo' jo ndaⁿana ndo' na cato'ñoom'yo' na m'aⁿna na wi' n'omna 'o ee cwila'yu'ya n'om'yo' ñ'eⁿndyena, ²⁴ juu naya na matseixmaⁿ Ty'ooots'om, quiaaⁿ juuna' ndaaⁿ cha'tsondye nn'aⁿ na ticala'chuii' na m'aⁿ na jnda nquiu Taya Jesucristo.